



*Имом
Абу Мансур
Мотуридий
*Аллоҳ таоло
белгилаб қўйган
хадлар ва
харом ишлар
*Шахидлар онаси
Хансо розияллоҳу
анҳо
*Ота-онага
нафака килиш
*Аёллар хусусида
Аллоҳдан
қўрқингиз!

мина

ижтимоий-маърифий журнал

31-сон 2020/1441

Омна

электрон журнали

Бадиий раҳбар:

Одинахон МУҲАММАД СОДИҚ

Ҳайъат аъзолари:

Мадина Джураева
Азиза Жалолиддинова
Муҳайё Муҳаммад Юсуф
Оиша Ҳусанова
Гулшода Аллоқулова
Адолат Ҳусанова
Дилдора Қурбонова
Зарнигор Аҳмадалиева

Муҳаррир:

Барно САИДРАҲМОН
Райҳона ШОМИРЗАЕВА

Дизайнер:

Рухсора АЗИЗОВА



Электрон манзил: muslimaat@islom.uz



ИМОМ АБУ МАНСУР МОТУРИДИЙ

Имом Абу Мансур Мухаммад ибн Мухаммад ибн Маҳмуд ал-Мотуридий Самарқандда туғилиб, ўсиб, таълим олиб, ижод килиб, хижрий 333 санада шу ернинг ўзида вафот этган. Камолиддин Баёзийнинг таҳқиқига кўра Имом Мотуридийнинг насаби улуғ саҳобий Абу Айюб Ансорийга бориб тақалади. Шунинг учун у зотга “Ансорий” нисбати ҳам берилган. У киши ҳанафий мазҳабида бўлиб, имом Аъзамнинг шогирдлари имом Мухаммад ибн Ҳасан раҳматуллохи алайҳининг икки восита или шогирдлари бўлган. Яъни у кишининг устозлари имом Мухаммаднинг шогирдлари бўлган.

Имом Абу Мансур Мотуридий раҳматуллоҳи алайҳи Мовароуннаҳрда аҳли суннанинг шайхи бўлган. Бу ерда аҳли сунна ғолиб бўлгани учун у киши ҳар хил йўлларда ва турланишларда бўлмаган. Балки

аввал бошдан мўътадил йўлдан бориш имконини топган. У киши кези келганда нақлга, кези келганда ақлга суюниб иш кўрган.

Имом Абу Мансур Мотуридий раҳматуллоҳи алайҳи фуқаҳолар

ва муҳаддислар даъват қилган нарсага чақирган. У киши жуда ҳам машҳур бўлиб, Мовароуннаҳрда барча унга мурожаат қилган. У кишидан фикҳ, усули фикҳ ва бошқа диний илмлардан таълим олганлар.

Имом Абу Мансур Мотуридий раҳматуллоҳи алайҳи усул бўйича «Китобул жадал»ни ва фиқҳда «Маъохизушшарийъа» китоблари ни таълиф қилганидан кейин шуҳрати яна ҳам ошиб кетди. Шундан кейин илми қаломда шуҳрат қозониб, Ҳурросон аҳлининг мазҳаб соҳибига айланди.

Имом Абу Мансур Мотуридий раҳматуллоҳи алайҳининг ақийдадаги мазҳаби Абул Ҳасан Ашъарийнинг мазҳабига тенг бўлди.

Имом Абу Мансур Мотуридий раҳматуллоҳи алайҳи бир қанча китоблар ёзган. «Китобур радди ала ал-Қаъбий ал-Мўтазилий», «Китоб авҳомул Мўтазила», «Китобур радди ала ал-Мўтазила», «Китобур радди ала ал-Қаромита», «Китобур радди ала-ар-Рофиза», «Китобут тавҳид» ва «Таъвилоту аҳлис сунна» китоблари шулар жумласидандир.

Аҳли сунна вал жамоа мазҳабининг икки катта имомларининг ақийдаларини солиштириб кўрган шайх Муҳаммад Абдуҳу икки томон ўтизга яқин масалада хилоф қилганларини, аммо аксарият уламо-

лар бу хилофлар фақат лафзда экани, жавҳар эса тамоман бир-бира га ўхшаш эканини таъкидлашларини қайд қилган.

Имом Мотуридийга узотни яқиндан таниган уламолар ва шогирдлари томонидан мартабаларини намоён қилувчи кўплаб лақаблар берилган:

- Имомул ҳудо (тўғри йўлга бошловчи);
- Имомул мутакаллимийн (қалом илми олимлари пешвоси);
- Мусаҳҳиху ақоидил муслимийн (мусулмонларнинг ақийдаларидан хатоларни даф қилувчи);
- Роису аҳли сунна вал жамоа (Аҳли сунна вал жамоа бошлиғи);
- Носирус сунна ва қомиъул бидъа (суннатни ҳимоя қилувчи ва бидъатни бостирувчи);
- Муваттиду ақоиди аҳлис сунна (аҳли сунна ақийдалари асосчиси).

Баъзи муҳаққиқ уламолар Мотуридий билан Ашъарийнинг ораларида асосан учта масалада хилоф борлигини айтадилар.


Биринчиси: Ашъарий ҳолни нафий қиласи ва шунинг учун унинг фикрича, сифати зоидалар йўқ ҳисобланади. Ал-Мотуридий эса уларни событ, дейди.

Имом Абу Мансур Мотуридий раҳматуллоҳи алайҳи: «Таквийн сифати бор, у ҳар бир махлуққа шомил сифатдир», дейди. Имом Ашъарий бу номдаги сифат йўқлигини айтади.

Шунингдек, улар савобу иқоб ҳамда ирода ҳурлиги ҳақида ихтилоф қилишган.

Имом Абу Мансур Мотуридий раҳматуллоҳи алайҳи ўзининг тафсирида мўтазила, ҳавориж, рофиза, карромий, жаҳмий, мушаббиҳа, мунажжим, фолбин ва бошқаларнинг фикрларини муноқаша қилган ва ҳаммаларига раддия берган. У киши Аҳли сунна вал жамоанинг мазҳабини қўллаб-қувватлаган.

*Шайх Муҳаммад Содик
Муҳаммад Юсуфнинг
“Сунний ақийдалар”
асаридан фойдаланилди.*



Аллоҳ таоло белгилаб қўйган ҳадлар ва ҳаром ишлар

Абу Саълаба Хушаний Журсум ибн Ношир ро-
зияллоҳу анҳудан ривоят қилинади:

«Расулуллоҳ соллаллоҳу алайҳи васаллам дедилар:
«Аллоҳ таоло бир қанча фарзларни лозим этди,
бас, уларни зое қилмангиз. Ҳад-чегараларни бел-
гилади, уларни босиб ўтмангиз. Айрим нарсалар-
ни ҳаром қилди, уларга яқин йўламангиз. Баъзи
нарсалар хусусида – унуганидан эмас, сизларга
марҳамат кўрсатиб, – сукут қилди, бас, улар устида
баҳс қилмангиз.

(Дорақутний ва бошқалар ривоят қилганлар)

Ҳадисдан олинадиган фойдалар:

1. Фарз ва вожибларга
тўлиқ амал қилмоқ.

Аллоҳ таоло бандала-
рига буюрган намоз, закот,
рўза ва ҳаж каби амаллар
фарз ҳисобланади.

Шофеъийлар наздида
Китоб, Суннат, ижмөъ ёки
бошқа бирор шаръий да-
лил билан событ бўлган
нарсалар фарз дейилади.
Улар фарз ва вожибларга

ларни бир хил маънода
деб билишади. Фақат ҳаж
масаласида мазкур икки
лафзни фарқлайдилар:
яъни ҳаждаги фарзнинг
мисоли қурбонлик билан
ўнгланмайдиган ифоза та-
воғидир. Қурбонлик би-
лан тўлдирилса бўладиган
видолашув тавофи эса во-
жибларга саналади.

Ҳанафийлар наздида

фарз ва вожибларга
алоҳида маъноларни ифо-
далайди. Уларнинг фикрига
кўра қатъий далил билан
событ бўлган ҳукм фарз
ҳисобланади. Масалан, на-
моз, закот, рўза...

Вожибларга "зонний" (гу-
монли) далил билан событ
бўлган ҳукмдир. "Зонний"
далил деганда қиёс ёки
бир кишининг хабари на-
зарда тутилган. Бунга фитр
садақасини мисол келти-
риш мумкин.

Фарзлар икки қисмга
бўлинади: фарзи ъайн ва
фарзи кифоя.

Фарзи ъайн ҳар бир му-
каллаға айнан тегишли
бўлган фарзлар. Масалан,
беш вақт намоз, закот,
рўза...

Фарзи кифоя эса маълум
тоифанинг у билан машғул
бўлиши билан бошқалар

устидан соқит бўладиган фарз. Агар ҳеч ким фарзи кифояни адо этмаса, ҳамма баробар гуноҳкор бўлади. Масалан, жаноза намози, саломга алик олиш, амри маъруф ва наҳий мункар...

2. Аллоҳ таоло белгилаган ҳадларни босиб ўтмаслик.

Ҳадлар – инсонларни ҳаромдан тўсишга хизмат қилувчи шариатда белгиланган жазолар. Масалан, зино ҳадди, ўғрилик ҳадди, ароқ ичганинг ҳадди ва ҳоказо...

Фатҳ йилида Бану Махзум қабиласидан бир аёлга ўғрилик ҳадди тайин қилинди. Усома ибн Зайд розияллоҳу анҳу ўша аёлнинг жазосини енгиллатишларини сўраб, Пайғамбар соллаллоҳу алайҳи васалламга мурожаат қилганларида, Набий соллаллоҳу алайҳи васалламдан қуидагича танбех эшидилар:

“Сен ҳали Аллоҳ таолонинг ҳадларидан бирида ўртага тушяпсанми?!”

Аллоҳ азза ва жалла белгилаб қўйган бу ҳадлар ҳеч қандай зиёдаю нуксонсиз тўла-тўкис амалга оширилмоғи лозим.

Ароқ ичган кимсага Мұхаммад соллаллоҳу алайҳи васаллам ва Абу Бакрнинг даврларида қирқ дарра урилар эди. Аста-секин бу ҳаром ичимликни ичувчилар кўпайиб боргани боис Умар розияллоҳу анҳу нафси бузукларни тийиб қўйиш мақсадида ижтиҳод қилиб, ароқхўрнинг ҳадди-

ни саксон даррага кўтардилар. Умар розияллоҳу анҳунинг бу ижтиҳодлари шаръян дуруст ва мақбул ижтиҳодdir. Шу боис Али ибн Абу Толиб розияллоҳу анҳу бундай деганлар:

“Албатта, ҳар иккиси: зиёда этилгани ҳам, зиёда этилмагани ҳам суннадир”.

Чунки Расулуллоҳ соллаллоҳу алайҳи васаллам Умар розияллоҳу анҳуга иқтидо қилишни алоҳида ҳам, умумий тарзда ҳам таъкидлаганлар: “Мендан кейин Абу Бакр билан Умарга эргашинглар!” “Сизлар менинг суннатим ва ҳидоятга йўлланган хулафои рошидинлар суннатини лозим тутингиз!”

Саҳобалар Умар розияллоҳу анҳунинг юқоридаги ижтиҳодларини тўлиқ қабул қилишди. Хусусан, Али розияллоҳу анҳу айтган қуидаги сўзлардан сўнг ушбу ижтиҳодга нисбатан асҳоби киромлар қалбида ҳеч қандай ғашлик қолмади.

Али ибн Абу Толиб розияллоҳу анҳу дедилар:

«Эй Мўминларнинг амири! Ароқ ичган кимса алжирашга тушади. Алжираган одам албатта туҳмат-бўхтон қиласи. Аллоҳнинг Китобида туҳматчининг жазоси саксон даррадир...

“Покиза аёлларни бадном қилиб, сўнгра тўртта гувоҳ келтира олмаган кимсаларни саксон дарра уринглар ва ҳеч қачон

уларнинг гувоҳликларини қабул қилманглар! Улар фосиқ кимсалардир”

(Нур сураси, 4-оят).

3. Ҳаромдан ҳазар қилмок.

Китобу Суннатда ҳаромлиги қатъий айтиб қўйилган барча мункар амаллардан тийилиш, улардан пок сақланиш буюрилган. Қатъий ҳаром ишларга ёлғон гувоҳлик бермок, етимнинг молини емок, судхўрлик каби нопок қилмишларни мисол қилиб келтириш мумкин.

“Айтинг, Парвардигоrim бузуқ ишларнинг ошкорасини ҳам, махфийсими ҳам ҳаром қилди!”

(Анъом, 151-оят).

Расулуллоҳ соллаллоҳу алайҳи васаллам дедилар:

“Ҳар қандай маст қилувчи нарса ҳаромдир!”. “Қонларингиз, мол-давлатларингиз ва обрўларингиз бир-бирингизга ҳаромдир”.

Китобу Суннатда ҳаром қилинган нарсаларга соғлом ақл ва инсоф кўзи билан қараган инсон, шубҳасиз, уларда очиқ-равшан иллатларни топади. Чунки уларнинг барчаси нопокликдан бошқа нарса эмас. Шариатда нима ҳаром қилинмаган бўлса, у ҳалолпокиза неъматдир.

4. Аллоҳ таолонинг бандаларига қилган марҳамати.

Аллоҳ субҳанаҳу таоло айрим нарсалар хусусида сукут қилди. Яъни, уларни на ҳалол ва на ҳаром деди.

Расулллоҳ соллаллоҳу алайҳи васаллам буни Аллоҳ таолонинг бандаларига қилган марҳамати деб таърифладилар. Бинобарин, ҳукми айтилмаган ишларни қилишда ҳеч қандай танглик йўқ. Албатта, Аллоҳ таолонинг ушбу сукути хато ёки унудиши орқали содир бўлгани йўқ. Зоро, Қодир ва Мехрибон Яратувчи бундай нуқсонлардан буткул покдир! “Парвардигорингиз унугтувчи эмас”. (Марям, 64-оят). “Парвардигорим адашмас ва унумтас”.

(Тоҳо, 52-оят).

5. Кўп савол бериш ва чуқур кетишдан қайтарилган.

Мазкур ҳадисдаги қайтариқ фақат Набий соллаллоҳу алайҳи васаллам замонларига хос бўлиши ҳам мумкин. Чунки ҳукми айтилмаган нарсалар ҳақида сўраб-суриштиравериш ўша нарсалар хусусида қатъий ҳукм туширилишига сабаб бўлиб қоларди. Натижада ўша нарса ҳалол ёки ҳаром деб ҳукм оларди.

“Эй мўминлар, (Аллоҳ сизлардан кечиб юборган) очилганида сизларни хафа қиласидиган нарсалар ҳақида сўраманглар”. (Муїда сураси, 101-оят).

Бироқ юқоридаги қайтариқнинг ҳамма замонлар учун умумий бўлиши ҳам эҳтимолдан холи эмас. У ҳолда мазкур қайтариқдинда чуқур кетишга таалуқли бўлади.

Абдуллоҳ ибн Масъуд розияллоҳу анҳу айтадилар:

“Беҳуда нарсаларни сўраб-суриштиришдан ва ғулув кетишдан эҳтиёт бўлинглар. Сизлар эски нарсани (яъни саҳобалар йўлини) лозим тутинглар”.

Саҳобаи киромлар Набий соллаллоҳу алайҳи васалламга кўп савол берманлари боис мусофиirlар келса, хурсанд бўлишарди. Чунки мусофиirlар Пайғамбар соллаллоҳу алайҳи васалламдан турли масалалар ҳақида савол сўрашарди. Набий соллаллоҳу алайҳи васаллам берган жавобларни саҳобаи киромлар ҳам эшишиб олар эдилар.

Биз учун ҳолати номаълум бўлган, бироқ иймон келтиришимиз шарт қилинган нарсалар хусусида баҳс юритиш фойдасиз баҳс-мунозара таркибиغا киради. Чунки бундай беҳуда масалалар кишини шак-шубҳага солиб қўяди. Баъзан инсон куфр калимасини айтиб қўйиши ҳам мумкин.

Ибн Исҳоқ айтадилар: “Холиқ ҳақида ҳам, маҳлук ҳақида ҳам аниқ эшишибмаган нарса асосида тафаккур қилиб бўлмайди.

Мисол учун Аллоҳ таолонинг ушбу оятини олайлик: “Мавжуд бўлган барча нарса ҳамду сано айтиш билан У Зотни поклар”. (Исро сураси, 44-оят).

Хўш, жонсиз нарсалар

қандай қилиб тасбеҳ айтаркин, - деб фикр юритиш мумкин эмас. Боиси -

Аллоҳ таоло ҳар бир нарсанинг тасбеҳ айтиши ҳақида хабар бермоқда. Энди жонсиз нарсаларнинг қай тарзда тасбеҳ айтишини Аллоҳ таолонинг Ўзи билади ва Ўзи хоҳлаган равишида қилиб қўяди!”

Расулллоҳ соллаллоҳу алайҳи васаллам дедилар:

“Қай бирингизнинг олдига шайтон келади-да, “Уни ким яратган? Буни ким яратган?” дейишга тушади. Охир-оқибат “Парвардигорингни ким яратган?” дейди. (Бунаقا пайтда) инсон Аллоҳдан паноҳ тилаб, ўзини тийиб олсин!” (Бухорий ривоятлари).

Расулллоҳ соллаллоҳу алайҳи васаллам дедилар: “Одамлар сўрашда давом этавергандаридан ҳатто “Аллоҳ бор маҳлукотни яратди.

Хўш, Унинг ўзини ким яратган?” дейишгача бориб етишади. Кимгаки ана шундай бирор ўй-фикр келса, “Аллоҳга иймон келтирдим!” деб айтсин”. (Муслим ривояти).

6. Биз фарзларни бажаришга, ҳадларга риоя қилишга ва ҳаромдан йироқ юришга буюрилганмиз.

Айрим нарсалар хусусида сукут қилинган бўлса, бу ҳам Парвардигоринг бизга кўрсатган марҳаматидир.

“Ҳадис ва ҳаёт” туркумидан

ХАРАМДАГИ НАМОЗЛАРДА

АЁЛЛАРНИНГ ЭРКАКЛАРГА ЯКИН ТУРИШИ

Масжиди Ҳаром ва Масжиди Набавийдағи жамоат намозларида аёллар ҳам иштирок этадилар. Масжиди Ҳаромда дарвозалардан кирилган жойда аёлларнинг намоз үринлари ажратиб қўйилган. Атрофидаги чиройли китоб жавонлари девор вазифасини ўтайди. Эркакларнинг у ерга кириши мумкин эмас. Масжиди Набавийнинг ҳам ўнг ва чап тарафидаги жуда катта қисми аёллар учун тайин қилинган. У ерга эркакларнинг ҳатто яқинлашиши ҳам жиноят. Шунинг учун Масжиди Набавийда аёлларнинг намоз масаласида ҳеч қандай қийинчилик туғилмайди.

Лекин Масжиди Ҳаромда аёллар намоз ўқишлиари учун алоҳида шароитлар яратилган бўлса-да, улар намозда эркаклар орасига аралашиб, ажиб ва ғаройиб манзара пайдо қиласидилар. Бир аёлнинг эркак-



лар сафига кириб олиб, намозга иштирок этиши натижасида уч эркакнинг намози фосид бўлади:

1 – аёлнинг ўнг томонидаги; 2 – аёлнинг чап томонидаги; 3 – аёлнинг орқасидаги эркак. Агар иккита аёл ёнма-ён ту-

риб олса, 4 та, яъни ўнг ва чапдаги ҳамда орқадаги 2 та эркакнинг намози фосид бўлади. Буни муҳтарама аёлларимиз, опа-сингилларимиз яхшилаб тушуниб олишлари шарт.

Замира Тўйчиева



Шаҳидлар онаси Хансо розияллоху анҳо

«Эй Ханас!»

Расулуллоҳ соллаллоҳу алайҳи васаллам бу саҳобийя розияллоҳу анҳони шундай чақирав әдилар.

Пайғамбаримиз алайҳиссалом бошқа күп араблар каби шеъриятни яхши тушунар әдилар. У зот соллаллоҳу алайҳи васалламнинг саҳобалари орасида ҳам шоирлар бўлиб, Расулуллоҳ соллаллоҳу алайҳи васаллам уларни Ислом ҳимояси йўлида шеър ёзишдан қайтартмагандар. Сизларни таниш-

тиromoқчи бўлган саҳобийя Хансо розиллоҳу анҳо ҳам ўша даврнинг энг маҳоратли шоираларидан бўлганлар.

Хансо розияллоҳу анҳонинг тўлиқ исмлари Тамодур бинт Амр ибн Ҳорис Суламий бўлиб, у Бану Сулайм уруғидан эди. У жуда чиройли, одобли эди. Ёшлик пайт-

лариданоқ шеъриятга қизиқди. Акалари Саҳр ва Муовия вафот этгач, қаттиқ қайғуга тушиб, таъсирланди. У шунчалар кўп йиғлар әдики, одамлар унинг йиғисини зарбулмасал қилишарди. Авваллари икки-уч мисрадан шеър ёзиб юрган Хансо кейинчалик ички иқтидори юзага чиқиб, акаларининг ёдига узун-

дан-узоқ таъсирчан ва балоғатли шеърлар ёза бошлади. Унинг нола ва фифон тўла шеърлари қалбларни эритиб юборарди. Шоирлар шеъриятда бошқа ҳеч бир аёл Хансога ета олмаслигини бир овоздан таъкидлар эдилар.

Хансо розияллоҳу анҳо Мадинага Бану Сулайм қабиласи вакиллари гурӯҳи билан бирга келди. Мадинада у Исломга келди ва Расууллоҳ соллаллоҳу алайҳи васалламга байъат қилиб, байъатида содик қолди.

Расууллоҳ соллаллоҳу алайҳи васаллам Хансо розияллоҳу анҳонинг шеърларини ёқтирас, унга илиқ муносабатда бўлар эдилар. Хансо розияллоҳу анҳо аёллар ичида ўзининг балоғат ва фасоҳати билан бирга, олийжаноблиги, иродаси ва матонати, шижоати ва фидокорлиги билан ажралиб турарди. Унинг энг ёрқин фазилатлари айниқса Қодисийя жангигуни намоён бўлди.

Қодисийя куни Хансо розияллоҳу анҳо бошқа аёллар билан бирга жангга чиқди. Улар аскарларга сув, егулик бе-

риб туар, жароҳатларидан хабар олишарди. Ибн Абдул Барр ўзларининг «Истийъоб» номли китобларида шундай ривоят қиласидар:

«Хансо бинт Амр Қодисийяда тўрт ўғли билан ҳозир бўлди. У ўғилларига жанг олдидан насиҳат қилиб, шундай деди: «Ўғилларим! Сизлар Исломга кириб, ҳижрат қилдингиз. Аллоҳга қасамки, сизларнинг барчангизнинг онангиз ҳам, отангиз ҳам бир. Аллоҳ таоло: «Эй иймон келтирганлар! Сабр қилинг. Сабр ила ғолиб келинг. Курашга бел боғлаб туринг. Аллоҳга

тақво қилинг. Шоядки ютуққа эришсангиз», деб марҳамат қилган (*Оли Имрон сураси, 200-оят*). Тонгда Аллоҳнинг изни билан соғ-саломат уйғонсангиз, бориб, душманга қарши ишонч билан жанг қилинг ва Аллоҳдан Унинг душманларига қарши ёрдам сўранг! Агар уруш кескинлашганини кўрсангиз, жасоратли ва бардошли бўлинг! Шоядки, мангу дунёда (охиратда) шараф топсангиз».

Шундан сўнг ўғиллари унинг насиҳатига амал қилишди, довюраклик билан жанг қилиб, бирин-кетин шаҳид бўлиш-

ди. Хансо розияллоҳу анҳога бу шумхабар етганида у киши: «Мени уларнинг шаҳодати билан неъматлантирган Аллоҳга ҳамд бўлсин. Аллоҳ таоло мени улар билан Ўз раҳмати соясида жам қилишидан умидворман», деди.

Исломидан олдин икки нафар акасининг ўлими туфайли йиллаб кўзёш тўкиб, бошқаларни ҳам ўз шеърлари билан йиғлатиб юрган Хансо қаерда-ю, ўзининг тўрт ўғли шаҳид бўлганида Аллоҳга ҳамд айтиб, барчани лол қолдирган муслима Хансо қаерда! Бугуннинг оналари учун Хансо розияллоҳу анҳонинг ҳаётларида катта ибрат бор. Бу воқеа бизга бу ўткинчи дунёдаги вазифамизни чуқурроқ ўйлаб кўришга, масъулиятимиз юкини ҳис қилиб кўришга ундейди.

Манбалар:

1. Лина Ал Ҳимсий «Саҳобийят: Ал Хансо» (islamway.net).
2. Al-Khansa (Tamadur bint Amr ibn Shareed) (idealmuslimah.com).
3. «Қиссатул Ислам. Ал Хансо» (islamstory.com).

Зарнигор тайёрлади

Аҳмад Ҳодий Мақсудий

Аҳмад Ҳодий Низомуддин ўғли Мақсудий – атоқли жамоат арбоби, муаллим, журналист ҳамда ношир.

Ҳаёт йўли

Аҳмад Ҳодий Мақсудий 1868 йил, 28 сентябрда Қозон губернаторлиги Биектау тумани, Тошсув овулида (ҳозирги вақтда, Россия Федерацияси, Татаристон республикаси, Висогорский райони) мулла Низомуддин оиласида дунёга келди. Ушбу оиласида татар миллиатининг икки улуғ шахсияти – Аҳмад Ҳодий ва Садри Мақсудийлар туғилиб ўсади.

Аҳмад Ҳодий Мақсудий аввал отасининг овулдаги мадрасасида таҳсил олади. Сўнгра 1881 йили Қозон шаҳрига бориб, замонасининг машҳур мадрасаларидан бири бўлмиш Қосимия мадрасасида 8 йил таҳсил олади.

1890-1892 йилларда Қосимия мадрасасида муаллимлик қиласи. Мадрасалар ва маориф тизимида жиддий ислоҳотлар лозимлигини анлаган Аҳмад Ҳодий 1892 йил татар маорифида чин маънода инқилоб ясаб, татар алифбосига 6 та ҳарф киритди. «Имляда ишетелгэнчә язу тиешле» – имлода ишлатилувчи ёзувга тегишилди, деган қоидага асосланиб, ўзининг “Муаллими аввал”, “Муаллими соний” алифбосини нашр қилди.

Аҳмад Ҳодий Мақсудий татар мактаб ва мадрасалари учун ўттиздан ортиқ диний, дунёвий фанлардан дарслик, методик қўлланмалар ёзди. Унинг “Муаллими аввал” ҳамда “Ибодати исломия” дарсликлари араб ва бошқа тилларга таржима қилиниб, Миср мактабларида дарслик сифатида ўқитилган.



Ноширлик ва муҳаррирлик фаолияти

1893 йилда Мақсудий Туркияга бориб, у ердаги янги таълим тизими билан танишади. Татар тилида газета чиқариш орзусида бўлган Аҳмад Ҳодий у ерда газета нашр қилиш сирларини ўрганади. Шундан сўнг туркиялик ёзувчи Ж. Мидҳат билан танишади. “Иқдам” газетаси муҳаррири билан дўстлашиб, ҳатто бироз вақт шу газетада ҳам ишлайди. Туркиядан қайтгач, И smoилбек Гаспринский чорлови билан Қrimдагi Boғchasarойga боради ва “Зинжирли” мадрасасида мударрислик қилиб, “Таржимон” газетасида ҳам ишлайди.

1896 йилда Аҳмад Ҳодий Мақсудий Қозонга қайтади ва Қозон ўқитувчилар мактабида имтиҳонлар топшириб, ўқитувчилик дипломини олади. “Бертуған Юнусовлар” ҳомийлигидаги Мусулмон болалар билим юртида татар тили, тарих ва жуғрофия фанларидан дарс беради. Бир қанча дарслик ёзиб, илмий фаолият олиб боради.

1892 йиллардаёқ газета чиқаришни ўзига мақсад қилган Мақсудий 1905 йилга қадар тўрт-беш моротаба “Юлдуз”, “Кундуз” ва “Қозон” номли газета ҳамда “Юлдуз” номидаги журнал чоп этишга рухсат сўраб, Матбуот ишлари бўйича Бosh идорага илтимосномалар ёзади, аммо



рухсат ололмайди. Лекин 1905 йилги Инқилобда бунга имкон туғилади ва 1906 йил 15 январда биринчи татар газетаси – “Юлдуз”нинг ilk сони дунё юзини кўради. Шу кундан бошлаб, 12 йил давомида аввал бошда ҳафталиқ, сўнг ҳафтада икки маротаба, бора-бора кундалик бўлиб чиқа бошланган газета тиражи 8 мингга етади. Газета яхши қофозга, юқори техникалар билан осон ўқиладиган тилда бо силади.

“Юлдуз” газетасининг жамиятдаги мавқеи, ўз саҳифаларида халқнинг муаммоларига бўлган эътибори, муносабати, Подшоҳ ҳукуматининг сиёсати, Россия давлат думаларида кўрилган масалалар, уларнинг ечимлари, у ерда кўрилган қонун лойиҳаларига бўлган муносабатни ёритиши газета муҳаррири Аҳмад Ҳодий Мақсудийнинг замонасилининг зиёли, чин заковатли сиёсатчиси бўлганини кўрсатади. 1918

йилда 21 июнида 12 йил татар халқига хизмат қилган “Юлдуз” газетасининг сўнги 1900-сони чоп этилади.

Жамоат арбоби сифатида

Аҳмад Ҳодий Мақсудий Қозонда биринчи татар кутубхонаси – “Кутубхонаи Исломия”нинг асосчиларидан ҳисобланади. Кутубхона 1906 йили 2 январ куни очилди ва ўша кундан то 1923 йилгача Мақсудий унинг мудири бўлган. Кутубхонанинг молиявий таъминоти “Маҳаллий мусулмонларга ёрдам” Бирлашмаси раиси Б.Апанаев ёрдами билан шаҳар думаси орқали ҳал этилади. Ҳар йил кутубхонага 1000 сўмлаб субсидия бериб борилган. Кутубхонада хотин-қизлар учун ҳам алоҳида бўлим ташкил этилган эди.

Аҳмад Ҳодий Мақсудий “Иттифоқул муслимийн” фирқа (партия)сининг асосчиларидан бири ҳамда унинг қурултойларида қатнашувчи аъзоси ҳисобланган. Шу партиянинг мактаб-мадраса ишлари Кенгashi котиби ўлароқ, Қозон шаҳар думаси аъзоси бўлиб, катта муаммолар юзасидан кўплаб чиқишлилар қилган. Биринчи жаҳон уруши йиллари, 1914 йилнинг август ойида Қозон шаҳрида Петрограддан кейин иккинчи бўлиб, урушда ҳалок бўлганларнинг оилалари ҳамда яра-

ланган аскарларга ёрдам бериш мусулмон қўмитасининг тузувчиларнинг етакчиси бўлади.

Мулла С. Иймонқулий билан биргаликда шу қўмитанинг ишларини бошқаради.

Инқилобдан сўнг

Октябр инқилобидан сўнг беш-олтида тилни билган, ўттиз йиллик педагогик тажрибага эга бўлган, ўттиздан зиёд дарслик асарлар муаллифи бўлмиш педагог-муаллим, журналист, маориф ва маданият борасида буюк хизматлар қилган Аҳмад Ҳодий Мақсудий совет ҳукумати учун кераксиз бўлиб қолади. Унга 1927 йил ҳукумат тарафидан «пожизненно» (умрбод) деган нафақага чиқарилади ва оига 50 сўмдан нафақа тайинланади. Мақсудий Педагогика олийгоҳида араб тилидан дарс беради, сўнг босмахонада саҳрофлик (китоб саҳифалаш) ишини бажаришга мажбур бўлади.

Шу шароитларда ҳам олим ўз илмий фаолиятини тўхтатмайди. 1927 йили беш минг нусхада бугунги кунга қадар ўз қимматини йўқотмаган “Фанни қомус” – биринчи татарча энциклопедиясини чоп эттиради.

Октябр инқилобидан сўнг мусулмон зиёлилари бошига келган тақиб ва тазийклар татар зиёлиларини ҳам, хусусан, Аҳмад Ҳодий Мақсудийни ҳам четлаб



ўтмади. У 1933 йили 16 январда қамоқقا олинди. У “Совет Социал-Фашистлар партия”сини ташкил этишда, Қозон атрофидаги туманларда совет ҳукуматига қарши иш олиб борища, Туркия фойдасига жосуслик қилишда ва кўплаб қочқинларга ёрдам бериша айбланиб, жиноий иш қўзғатилади. Шунингдек, Қозон ва унинг атрофидаги туман мулла-мударрислари, муаллимлари ҳам Абдул Ҳодий Мақсудий билан бирга фаолият юритишда айбланиб, ҳибсга олинади. Мақсудий эса уч йилга Вятка шаҳрига сургун қилинди.

Аҳмад Ҳодий Мақсудий сургунда ҳам илмий фаолиятини тўхтатмади. Шарқ фалсафасини яхши билган олим сургундалик вақтида фалсафага оид «Шарқона мантиқ» (Восточная логика) асарини ёзади, уни рус тилига ҳам таржима қила-

ди. Бу китоб биринчи татар тилидаги фалсафасий асар ҳисобланади.

Сургун муддати тугагач, 1936 йил охирларида Мақсудий Қозонга қайтади. Лекин озодликда узоқ яшамайди. 1937 йили январь ойида уни инқилобга қаршилик ҳаракатида айблаб, қайта қамашади.

1937 йил 10 январь Аҳмад Ҳодий Мақсудийга қарши очилган жиноий иш саломатлиги ёмонлашгани туфайли тўхтатилади ва 1937 йили 2 февралда ёпилади. Шу билан ажрим ҳукми чиқмасдан қолади. Турмадан чиққач, Аҳмад Ҳодий узоқ яшамайди. 1941 йил 28 июлда буюк мутафаккир олим вафот этади.

Татар вақтли матбуотида унинг ўлими ҳақида хабар қилинмайди. Аммо 1941 йил охирларида Анқарада чиқадиган “Янги тонг” газетасида Баттол Тоймаснинг Аҳмад Ҳодий Мақсудийга бағишлиланган мақоласи чиқади. Сўнгра “Жумҳурият” газетасида эса М. Файзининг Мақсудий вафотига бағишлиланган таъзия мақоласи чиқади.

Аҳмад Ҳодий Низомуддин ўғли Мақсудий 1995 йили Россия Федерациясининг 1991 йил 18 октябрдаги “Сиёсий репресия қурбонларини оқлаш” тўғрисидаги Қонунига кўра “айбсиз” деб топилади ва оқланади.

Анвар Аҳмад

Сүнгги пайтларда юртимизда китобхонликка алоҳида эътибор берилмоқда. Бу борада кенг кўламли хайрли ишлар амалга оширилмоқда. Халқимиз ичидаги турли мавзуларда китоблар таълиф қилинаётганни, айниқса аёл-қизлар ичидаги қалам тебрататётган опа-сингилларимизнинг сафи тобора кенгайиб бораётгани қувонарли ҳолдир. Илмий-оммабоп асар ижодкорнинг йиллар давомида тўплаган илм ва тажрибаларининг маҳсулидир. Бу эса самарадорликка эришишида муҳим аҳамиятга эга. Ана шундай руҳий қувват бахши этиб турдиган илҳом манбаи пок қалб, кенг дунёқарашиб чуқур билим ҳисобланади. Мана шундай пок хислатларни ўзида жо этган «Қалам ва битик аҳли» мукофоти соҳибалиридан бири, «Хадичаи Кубро» аёл-қизлар ўрта маҳсус ислом билим юрти етакчи мударрисаси, «Қуръон ўқитиши ва ёдлаш усуллари» ва отинойилар учун мўлжалланган «Қуръон сабоқлари» ҳамда «Анъанавий ва ноанъанавий таълим» китоблари муаллифи Гулобод Қудратуллоҳ қизи бугун саҳифамиз меҳмони бўладилар.



Ассалому алайкум устоз, яқиндагина «Анъанавий ва ноанъанавий таълим» деб номланган янги китобингиз нашрдан чиқиб, оммага тақдим этилди. Ушбу ютуқларингиз билан сизни чин қалбдан муборакбод этамиз. Дастрраб мана шу китобингиз ҳақида тўхталсангиз.

– Ўз бандаларига ҳар бир ишда ният, ихлос ва илмни шарт қилган Аллоҳ таолога Ўзининг жалолига яраша ҳамду санолар бўлсин! Ўз умматларига ният, ихлос ва илмда яхши ўrnak кўрсатган Пайғамбари миз алайҳиссаломга мукаммал ва батамом саловату саломлар бўлсин!

Ислом билим юртларида ўқитилаётган маҳсус фанлардан таълим берәётган мударрис ва мударрисалар Расууллоҳ соллалоҳу алайҳининг 37 та усуларини биринчи бўлимга киритдик.

Рисоланинг иккинчи бўлими айнан мадраса муаллимларининг сермашаққат, шу билан бирга, қизиқарли, серқиррали фаолиятларига бағишиланган. Бунда: муаллимнинг Роббисига; муаллимнинг ўзига; муаллимнинг жамияти ва миллатига; муаллимнинг шогирдларига; муаллимнинг ҳамкасбларига; муаллимнинг илми ва ўз касбига нисбатан вазифа ва одоблари каби мавзулар ўрин олган. Ислом таълимотида асрлар давомида мадраса ва мактабларда шаклланган усуллар жуда оддий, осонлиги билан авом халқни ўзига жалб қила олган. Мадрасаларда қўлланилган мана шундай усуллар жуда самарали бўлиб, оқибатда мадраса битирувчиларидан жуда ҳам кўп кўзга кўринган мутафаккир олим-уламолар етишиб чиқсан. Мазкур бўлимда “Мадрасага борувчи миллат” номини олишга сабаб бўлган мадрасаларда ўқитилган анъанавий таълим усуллари ҳам ўрин олган.

таълим бериш усулларини ўқиб-ўрганиб, ундан гўзал ибрат олишлари учун Расууллоҳ соллалоҳу алайҳининг 37 та усуларини биринчи бўлимга киритдик.

Рисоланинг иккинчи бўлими айнан мадраса муаллимларининг сермашаққат, шу билан бирга, қизиқарли, серқиррали фаолиятларига бағишиланган. Бунда: муаллимнинг Роббисига; муаллимнинг ўзига; муаллимнинг жамияти ва миллатига; муаллимнинг шогирдларига; муаллимнинг ҳамкасбларига; муаллимнинг илми ва ўз касбига нисбатан вазифа ва одоблари каби мавзулар ўрин олган. Ислом таълимотида асрлар давомида мадраса ва мактабларда шаклланган усуллар жуда оддий, осонлиги билан авом халқни ўзига жалб қила олган. Мадрасаларда қўлланилган мана шундай усуллар жуда самарали бўлиб, оқибатда мадраса битирувчиларидан жуда ҳам кўп кўзга кўринган мутафаккир олим-уламолар етишиб чиқсан. Мазкур бўлимда “Мадрасага борувчи миллат” номини олишга сабаб бўлган мадрасаларда ўқитилган анъанавий таълим усуллари ҳам ўрин олган.

Рисоланинг учинчи бўлимида муҳтарам устозларнинг мashaққат билан эгаллаган билимларини талабаларга янада тушунарли, осон, енгил усуллар ёрдамида етказиб беришлари учун умумий педагогиканинг асосий қисмлари муҳтасар тарзда баён қилинди. Унда педагогиканинг методологик асослари, тарбия ва таълим назариялари, мустақил таълимнинг баъзи шакл ва мазмунлари ёритилган. Мазкур мавзуларнинг мазмун-моҳиятлари янада тушунарли, қизиқарли бўлиши учун улар Расууллоҳ соллалоҳу алайҳи вассалламдан ворид бўлган ҳадислар асосида “Расууллоҳдан гўзал ўrnak...” рукни билан бойитиб борилди.

Али розияллоҳу анхунинг: “Болаларингизни ўз даври илмларини ўргатинглар, чунки улар сизнинг даврингиздан бошқа даврда дунёга келганлар” деган сўзлари жуда ҳикматлидир. Мутахассислик фанларини ўқитишда педагогик технологиялар (кейс стади, балиқ скелети, турли чизма ва диаграммалар, нибуфар гули методи) дан фойдаланиш таълим оловчиларни фикрлашга, кашфиётларга ин-

тилишга, ҳамкорлик ва шериклик сифатларини шакллантиришга, таълим берувчи томонидан берилган вазифаларни ҳал этиш режасини тузишга, ва энг асосийси, талабалар олдига қўйилаётган муаммони ҳал қилишга, уни мустақил муҳокама қилишга лаёқатли қилиб таълим ва тарбия бериш имкониятини яратади. Шунга кўра, рисоланинг тўртинчи бўлимида педагогик технология ва интерфаол методлар жой олди.

– Илм йўли жудаям қийин ва мashaққатли-дир. Бундай масъулияти ва мashaққатли йўлни танлашингизда нима туртки берган ва ким сабабчи бўлган?

– Ўрта мактабни аъло баҳоларга тугатгач, ма-лакали шифокор бўлиш ниятим бор эди. Умуман ўқитувчи бўлиш ниятим бўлмаган. Ота-онам эса ўқитувчи бўлишимни жуда хоҳлашган. Уларнинг дуоларини олиш мақсадида уларнинг қарорларига қарши боролмадим. Аллоҳга минг бор шукроналар бўлсинки, ота-онамнинг дуолари барокатидан дунёдаги энг шарафли касб эгаси бўлдим. Бу касбнинг шарафи Расулуллоҳ соллаллоҳу алайҳи васаллам

бутун инсониятга устоз, муаллим бўлганликлари-дадир. Расулуллоҳ соллаллоҳу алайҳи васалламнинг ҳар бир сўзида, ҳар бир ишида мўминлар учун гўзал намуна бор. Мана шу ўrnак биз устозларни ўз касбимизга муҳаббатли, садоқатли қиласди, хайрли амалларга шикоатлантиради.

– Сиз амалга оши-раётган илмий ишлар-нинг жамиятимиздаги фойдалари ва муҳимлиги ҳақида гапирсангиз.

– Ўқитувчилик фаолиятим туфайли турли давлатларда ўқитида-диган таълим усуллари ҳақида кўплаб маълумотлар тўплаб бораман. Ажабланарли жиҳати шундаки, қайси усулни ўрганмай, мазкур усулларнинг асоси Расулуллоҳ соллаллоҳу алайҳи васалламнинг таълим бериш усуларида мавжуд экан. Пайғамбари-миз соллаллоҳу алайҳи васалламнинг таълим беришлари методик усулларнинг хилма-хиллиги билан ажralиб турган. Расулуллоҳ соллаллоҳу алайҳи васаллам таълим беришда қалбга тез жо бўладиган, ақл кўтара оладиган, фаросат етадиган энг чиройли ва афзал усулни танлар

эдилар. Саҳобаларга ҳадис айтсалар, уни турли усулларда етказардилар: гоҳ савол билан, гоҳ жавоб билан, гоҳ саволнинг ўзига жавоб берардилар, гоҳ зиёда ҳам қиласди, гоҳ мисол келтирадилар, гоҳ ёзиб, гоҳ чизиб таълим берардилар, баъзан ташбех келтирадилар, баъзан ўз фикрларини очик айтардилар, гоҳида эса унга ишора қиласди, гоҳ масалани ечимиға олиб бориш учун савол бериб саҳобаларни имтиҳон қилсалар, гоҳида эса саволсиз ҳам таълим берардилар. Агар ҳар бир таълим берувчи мана шу усулларни ўрганиб, ўргата олса, албатта муваффақият қозонади, деб ўйлайман. Ана шу сабаб таълиф этилган китобларда асосан таълим оловчиларнинг қалбларига етиб борадиган усулларни ёритишга ҳаракат қилинмоқда.

– “Қуръон ўқитиш ва ёдлаш усуллари” китобингиз жуда оммалашди, деярли ҳар бир хонадонда ушбу китобга кўзимиз тушади. Ундан сўнг яна бир қанча китоблар таълиф этдингиз. Бундай муваффақиятларга эришишингизнинг сири нимада?

– “Қуръон ўқитиш ва ёдлаш усуллари” китоби 2011 йилда чоп этилди. Лекин бу китоб устида ишлаш анча олдин бошланган эди. 1997 йили Ҳадичаи Кубро аёл-қизлар ўрта махсус билим юртига ўқишига кириш насиб этди. Диний фанлардан таълим олаётган вақтимда баъзи маълумотларни яхши тушуна олмай қийналган вақтларим кўп бўлган. Касбим ўқитувчи бўлгани боис, маълумотларни тури усулларда, чизмалар, жадваллар орқали бериш йўлларини ишлаб чиқа бошладим. Кейинчалик, иш фаолиятимда ана шу ишланмаларни тажрибадан ўтказиб, тақомиллаштириб бордим. Расууллоҳ соллаллоҳу алайҳи вассалламнинг “Ўзингга раво кўрганни ўзгага раво кўрмагунингча ҳақиқий мусулмон бўла олмайсан” ҳадисига кўра, Қуръон ўрганувчиларга ҳам фойда бўлиши мумкинлигини ўйлаб, мазкур китобни чоп этирдик. Албатта, отам ва онамни менг берган таълим-тарбияларини оқлаш, уларни қўзларини қувонтириш ниятим ҳам бўлган. Аллоҳ таолога ҳамдлар бўлсинки, Яратганинг фазлу карами илиа бу китоб ўз муҳлисларига эга бўлди.

– Биламизки, кўп ийлардан буён “Ҳадичаи Кубро” аёл-қизлар ўрта махсус ислом билим юртида етакчи мударриса бўлиб фаолият юритасиз. Ушбу маскан ҳаётингизда алоҳида ўрин эгаллаган...

– Дарҳақиқат, Аллоҳ менга ушбу муборак масканда таълим олиш ва таълим бериш бахтига мұяссар қилди. Бу даргоҳда ўтказган 23 йиллик умрим ҳаётимга сурур, қалбимга сакинат бағишилган. Сабаби, айнан мана шу ерда Аллоҳ Ўзини ва Расулини таниш ва танитиш бахтига мұяссар қилди. Кўпгина устозлар, дўстлар ва шогирдлар орттиридим. Юқорида зикр қилинган китоблар устида ҳам шу масканда ишладим. Мени фикримча, таълим олиш ё таълим беришдан қатъи назар, ҳамма бу масканга боғланиб қолади ва уни ўз ихтиёри билан тарқ қилгиси келмайди. Мен ҳам ана шуларданман!


– Келгусида қандай мақсад ва режаларни ўз олдингизга қўйгансиз?

– Аллоҳ таоло Расууллоҳ соллаллоҳу алайҳи вассалламга Наҳл сурасининг 125 оятида: “(Эй, Муҳаммад!) Раб-

бингизнинг йўли (дини) га ҳикмат ва чиройли насиҳат билан даъват этинг! Улар билан энг гўзал услубда мунозара қилинг!” деб, таълим бериш холис Аллоҳнинг йўлида бўлиши, бу иш ҳикмат билан амалга оширилиши, инсонларнинг ижтимоий, маданий савияси ва бошқа омилларни эътиборга олиб, оғир келмайдиган йўсунда ўргатиш, таълим бериш яхши мавъиза орқали йўлга қўйилмоғи, инсонларни қизиқтириш, рағбатлантириш учун чиройли сўз ва гапларни топиб гапириш зарур эканлиги, уларни нафратлантирмаслик лозимлиги уқтирилмоқда. Расууллоҳ соллаллоҳу алайҳи вассаллам ҳаётлари мобайнида айнан мана шу оятда уқтирилганидек саҳобаларга таълим бериб, ҳаммага фойда келтириб яшадилар. Иншаллоҳ, менинг ниятим ҳам, қўлимдан келгунча, таълим соҳасида кичкина ишлар бўлса-да, уларни катта муҳаббат ва ихлос билан бажариб, инсонларга, жамиятга, динимга муносиб хизмат қилиш орқали фойда келтиришdir.

Дилдора Қурбонова
сұхбатлашиди

Ота-онаға нафақа қилиш



«Сендан нимани нафақа қилишни сўрайдилар. «Нафақа қилган яхшилигингиз ота-оналарга, яқин кишиларга, етимларга, мискинларга ва йўқсил йўлчиларга бўлсин. Қандай яхшилик қилган бўлсангиз, Аллоҳ уни албатта билувчиdir», деб айт» (Бақара сураси, 215-оят).

Аввало, бу ердаги «нафақа» сўзининг маъноси бизнинг тилимиздагидан кўра анча кенг эканини айтиб ўтиш керак. Бизда нафақа деганда кексайиб қолган одамларга давлат томонидан бериладиган молиявий таъминот тушунладиган бўлиб қолган. Аммо динимизда «нафақа», «инфоқ» деганда Аллоҳ таолонинг розилиги учун қилинадиган молиявий ибодат тушунилади. Масалан, эркак киши ўз оиласи ва қарамоғида гиларни таъминлаши инфоқ деб аталиб, унинг зиммасига возибдир.

Ояти каримада «Сендан нимани нафақа қилишни сўрайдилар» деб, савол нимани нафақа қилиш ҳақида бўлган эди. Жавобда эса нафақани кимларга қилиш ҳам баён этиляпти: «Нафақа қилган яхшилигингиз ота-оналарга, яқин кишиларга, етимларга, мискинларга ва йўқсил йўлчиларга бўлсин».

Демак, фақат яхшилик, эзгулик нафақа қилинар экан. Қуръони Каримда хайр, яхшилик сўзи ўз ўрнида мол-дунё маъносида ҳам ишлатилади. Бу жойда ҳам худди шу

маънони англатмоқда.

Нафақага лойиклар ичида биринчи навбатда ота-она зикр қилинаётгани бежиз эмас. Аввало, инсон табиати ўзи шуни тақозо қилади. Таъминотда кишининг ўзидан кейинги биринчи ҳақдори ота-онаси бўлади. Ота-онасини мухтож қилиб қўйиб, улардан бошқаларга нафақа қилишдан қандай манфаат бўлиши мумкин? Бу нарса на мантиқа, на инсонгарчиликка тўғри келади. Ота-онадан кейин нафақага ҳақдорлар яқин кишилар, қавм-қариндошлардир. Улардан

кейин эса ҳақдорлик жиҳатидан бошқалардан устунлар ва ҳоказолар келади. Нафақа қилиш худди шу тартибда бўлиши лозимлиги Пайғамбаримиз соллаллоҳу алайҳи васалламнинг ҳадисларида ҳам кўп зикр қилинган.

Имом Муслим Жобир ибн Абдуллоҳ розияллоҳу анҳудан ривоят қиладилар:

«Пайғамбаримиз соллаллоҳу алайҳи васаллам бир кишига: «Садақа қилишни ўзингдан бошла. Ортиб қолса аҳлингга қил, аҳлингдан ҳам ортиб қолса, қариндошларингга қил. Қариндошларингдан ҳам ортиб қолса, бошқаларга ва ҳоказоларга қил», деганлар».

Нафақа қилиш бандадан, унинг савобини бериш, тақдирлаш эса Аллоҳдандир. Шунинг учун ояти каримада «Қандай яхшилик қилган бўлсангиз, Аллоҳ уни албатта билувчидир», дейиляпти.

Аллоҳ таоло уни билади дегани оддий хабардор бўлади, бу иш Аллоҳга маълум бўлади дегани эмас. Аллоҳ таолонинг ота-онага ва оядда зикр қилинган бошқа тоифаларга қилинган нафақани билиши – бу амал учун беҳисоб ажру

савоблар ато этилиши, эҳсонларнинг ўрни тўлдирилиши, гуноҳларнинг мағфират қилиниши, тавбаларнинг қабул бўлиши, мушкулларнинг осон бўлиши ва энг асосийси, Аллоҳ таолонинг бу бандадан рози бўлишидир.

Келинг, Аллоҳ таоло ота-онага қилинган кичик бир яхшилик учун қанчалик катта мукофотлар бериши мумкинлиги ҳақидаги энг гўзал ҳикоялардан бирини эслайлик.

Ибн Умар розияллоҳу анҳумодан ривоят қилинади:

«Набий соллаллоҳу алайҳи васаллам шундай дедилар: «Уч киши йўлда кетаётган эди, бирдан қаттиқ ёмғир ёғиб кетди. Улар ёмғирдан қочиб, тоғдаги бир ғорнинг ичига кириб олишиди. Шу пайт тоғдан улкан харсангтош тушиб келиб, ғорнинг оғзи тўсилиб, ҳаммаёқ қоп-қоронғи зулматга чўмди. Шунда улар бир-бирларига: «Аллоҳ учун қилган солиҳ амалларимизни васила қилиб, дуо қилайлик, шояд кушоийиш берса», дейишди.

Улардан бири: «Аллоҳим! Қари ота-онам, ёш болаларим бор эди. Уларга ҳар куни кечқурун сут соғиб, ичирар

эдим. Аммо сутни болаларимдан олдин ота-онамга ичирар эдим. Бир куни уйга жуда кеч келдим. Қарасам, болаларим оч қолиб кетиби. Сутни соғиб, одатдагидек, аввал ота-онамнинг олдига олиб кирдим. Улар эса мени кута-кута, ухлаб қолишган экан. Уларнинг уйғонишини кутиб, бошларида туравердим. Болаларим оёғимга осилиб, сут сўраб йиғлашар эди, лекин аввал ота-онамга ичираман деб, уларга сут бермадим. Тонг отгунча шундай ҳолатда турдим. Аллоҳим, ўша ишни Сенинг розилигинг учун қилганимни билган бўлсанг, бизга бир тирқиш очгин, осмонни кўрайлик!» деди. Шу пайт тош бироз сурилди, тирқиш очилиб, ундан осмон кўринди...»

Бу уч мусоғир жуда қийин аҳволда қолишган эди. Ғорнинг ичидаги қолиб кетишиган, бирорни ёрдамга чақиришнинг ҳам иложи йўқ. Аллоҳга ёлворишдан бошқа ҳеч қандай чора йўқ. Аммо Аллоҳга ёлбориш ҳам ҳар хил бўлади. Аллоҳ таоло банданинг қандай ёлворишини тезроқ қабул қиласиди? Улар ўз ҳолатларидан келиб чиқиб,

ўйлаб-ўйлаб, бир қарорга келишди.

«Аллоҳ учун қилган солиҳ амалларимизни васила қилиб, дуо қилайлик, шояд күшойиш берса».

Улар Аллоҳ таолога қуруқдан-қуруқ ёлворишиңи ўзларига эп күрмадилар. Умрларыда Аллоҳ учун қилган солиҳ амалларини васила қилиб, Аллоҳдан омонлик сүрашни маъқул топдилар.

Биринчи бўлиб дуо қилган киши кекса ота-онасига чин ихлос билан қилган ҳурмат-эҳтироми ва хизматини Аллоҳга васила этишга қарор қилди. Унинг қари ота-онаси, ёш болалари бор экан. Ҳар куни ишидан қайтиб келиб, қўйларини соғиб, ота-онасининг ҳурматини қилас, сутни аввал уларга, кейин болаларига берар экан. Демак, уларнинг бошқа таомга имконлари йўқ экан. Бир куни у ишидан кеч қайтибди. Қараса, ота-онаси ухлаб қолишибди. Одатдагидек, сутни соғиб, ухлаб ётган ота-онасининг бошларига келибди. Уларга озор бермаслик учун уйғотишни ўзига эп кўрмабди. Уйғониб

қолишка, қоринлари оч ҳолда мени излаб қолишимасин деб, жойидан жилмай тураверибди. Ўзи кундузи билан ишлаб чарчаб келган бўлса-да, ухламабди. Болалари очликдан оёғи остида йиғлаб турса ҳам, ота-онам уйғомадилар.

«Пайғамбаримиз соллаллоҳу алайҳи вассаллам бир кишига: «Садақа қилишни ўзингдан бошла. Ортиб қолса аҳлингга қил, аҳлингдан ҳам ортиб қолса, қариндошларингга қил. Қариндошларингдан ҳам ортиб қолса, бошқаларга ва ҳоказоларга қил», деганлар».

ниб, сутсиз қолмасин деб, сутни болаларига бермабди. Тонг отгунча шу ҳолатда, ота-онасингин бошида тик туриб чиқибди.

Ана шу банда Аллоҳ розилиги учун ота-онасига ихлос билан қилган хизматларини васила қилиб, бошига тушган мушкулни аритишни сидқидилдан сўрабди. Аллоҳ таоло у одамнинг илтижосини қабул қилиб, мазкур солиҳ амали эвазига ғор оғзининг учдан бирини очибди.

Демак, Аллоҳнинг розилиги учун ота-онага иззат-эҳтиром кўрсатиб, уларга ихлос билан хизмат қилиш фарзандга нафақат охиратда, балки бу дунёда ҳам

яхшиликлар етишига сабаб бўлар экан. Ҳатто бошига тушган мусибатнинг қўтарилишига ҳам васила бўлар экан...

Шундай экан, ўзимизга савол бериб, унга инсоф ила жавоб берайлик-чи: ҳаммамиз ҳам ота-онамизга етарлича нафақа қила оляпмизми? Болаларимизга неча марталаб сарфлаганимизда ота-онамизга ҳам бир бор сарфляпмизми? Таъминот борасида ота-онамизни бошқалар афзал кўра оляпмизми?

Агар бу саволларга ижобий жавоб бера олсак, демак, Аллоҳ таолонинг раҳматига сазовор бандалардан бўламиз. Аммо, Аллоҳ арасин, бундай бўлмаса, тезда ўзимизни ўнглаб, Роббимизнинг раҳматига шошилайлик, ота-онамизнинг хизматига шошилайлик, қўлимиздан келган барча солиҳ амалларда аввало уларни биринчи ўринга қўйяйлик.

Аллоҳ таоло барчамизга бу дунёда мазкур ояти каримага амал қилиб яшаб ўтишни насиб айласин!

Одинахон
Муҳаммад Содик

Аёллар хусусида Аллоҳдан қўрқингиз!

Францияда ҳар етти дақиқада бир аёл зўрланади.

Бештадан битта аёл эрига хиёнат қилади.

Ҳар уч кунда оиласий можаролар туфайли битта аёл вафот этади.

Йилига 200000 аёл жинсий тажовузга рўбарў бўлади.

Франция ҳукумати ислом жамиятларини мусулмон аёлларнинг шароитларини яхшилаб беришга чақиришади!

Туркий Шалҳуб

Куни кеча янгиликларда Наманганда 28 ёшли аёлнинг эри томонидан қаттиқ калтакланиб вафот этгани хабар қилинди. Бир ойлик гўдаги бор аёлнинг шафқатсизларча калтаклангани қалбимни ларзага келтирди. Катта бир оиласда - ота ҳам, она ҳам, қайнин ака-укалари ҳам бор

хонадонда бир аёлнинг яшашга маҳкум этган бу эр-аёвсизларча калтакланиб, оғир аҳволда касалхонага ётиши ва кўп ўтмай вафот этиши қайси бир хонадонида қизи бор ота-она-нинг қонини қайнатмайди, ғазабини жунбушга келтирмайди! Гулдек қизининг умрини завол қилган, норасида гўдакни онасиз

яшашга маҳкум этган бу эр-какни ким оқлайди?!

“Ўлдириш ниятида урмаган-ку!” дея оқлашади яқинлари...

Бундай дил оғритадиган жиноятлар фақат бугина эмас, кун ора бўлмаса ҳам, аҳён-аҳёнда ахборотларда, ижтимоий тармоқларда тез-тез қулоғингиз ости-



да ваҳима солиб жаранглаб турибди. Бу жиноятни эшитмасимдан сал олдинроқ Жиззах шаҳрида 4-5 ойлик ҳомиласи бор аёлни эри лифтда ёндириб юборган эди...

Жаҳон банкининг "Аёллар, бизнес ва қонунлар – 20116" деб номланган ҳисоботида айтилишича, ҳозирда дунёдаги 46 мамлакатда оиласий зўравонликни тақиқловчи қонунлар йўқ. Кузатувларга кўра, юртимизда аёлларга нисбатан энг кўп қўлланиладиган зўравонлик тури бу – оиласидаги зўравонлик ҳисобланаркан.

"Аёлларга нисбатан бундай зўравонлик охирги иккич-уч йилда авж олдими ёки бу аввалдан мавжуд эдими?!"

Бу саволга UzAnalytics.com сайтига адвокат Зайнурга Толипова шундай жавоб беради: "Муаммо ўтган асрнинг турғунлик йилларидан бери авжида. Фақат жамиятнинг иқтисодий дарражасига қараб кўрсаткич ўсиб ёки камайиб турди, холос... Афсуски, унинг туб илдизлари жамият ва турмуш даражасига бориб тақалади". Мутахассиснинг айнан шу фикрини ҳаётда кузатгандарим билан, кўргандарим билан тасдиқлайман.

Болалагимдан то катта синф бўлгунимга қадар қўшнимиз Зайнаб опанинг оғриқли ҳаётига гувоҳ бўлганман. Шўрлик аёл эрининг калтакларидан қочиб, бизнинг уйдан паноҳ

топарди. Тонгдами, тундами, фарқи бўлмасди, бир аҳволда, соchlари тўзиган, кўзи кўкарган, баъзан оёқяланг, баъзан эса йиғлаб югуриб келарди. Онамнинг қаттиқўллигини билган эри бизникига ҳадди сиғиб киролмай қайтиб кетарди. Калтаклар зарбидан кўзлари ҳам яхши кўрмайдиган бўлиб қолган эди. Бир куни онамга: "Нега уйларига кетиб қолмайди?" дейман. Онам эса: "Учта боласи бор, қайга боради, онасиникига сифармиди? Сабр қилади-да! Бир кун эрига инсоф бериб қоллар..." дерди.

"Эрига бир кун инсоф бериб қолар..." Ўша келиши керак бўлган – инсоф бу эркакка дарров келмади. Аёл, онам айтганидек, сабр қилди. Жуда кўп! Аммо йиллар аёл ва болалар руҳиятида жуда кўп аламлар, изтироблар, дардлар уйғотиб улгурган эди...

Яна битта оғриқли факт. Нодира исмли яқин танишим бўларди. Анча тўқ жойга, катталар тили билан айтганда, "қийналмай яшайди"ган оиласага келин қилиб узатишли. Аммо оиласада тўқчилик бўлса-да, эр хотин ўртасида зиддиятлар жуда кўп эди. Тўғри, Нодирани эри ичмасди, аммо маънавий камситиб, шахсиятига тегиб, руҳан азобларди. У ўзини ҳимоя қилиб айтилган гаплар учун калтаклар зарбида қоларди. У уйдагиларига эри билан яшай олмаслигини бир неча марта айт-

ган, аммо уйдагилари ҳам, худди онам айтганидек, "Сабр қил! Эрингга бир кун инсоф бериб қолар..." деган овутишлар билан яна уйига олиб бориб қўяди. Аммо Нодира қўшним Зайнаб опа каби "сабр" қилломади. Бир куни уйида аввалгидай можаролардан бири бўлиб ўтди. У энди уйига бормади. Боришни ҳам истамади. У ўз жонига қасд қилди – ўзини осиб қўйди!

"Ўз жонингга қасд қилгин, деб урмаган!" деб яна оқлашади яқинлари...

Қайнона, қайнисингиллар аралашуви билан арзимаган баҳона билан эридан калтак ейдиган аёлларимиз қанча! Калтаклар остидаги қийноқларга чидай олмаган ва ўз жонига қасд қилган аёлларимизчи?! Одатда аёлларимиз қийин ва оғир ҳолатларга ҳам дуч келган вазиятда яқинларидан сир тутишади, айтишмайди, қўрқишиади ёки истиҳола қилишади. Аммо бунинг оқибати нималарга олиб келишини ўйлашмайди.

Оиласий зўравонликни ҳеч қандай шароитда оқлаб бўлмайди. Чунки у инсоннинг асосий ҳуқуқларига – ҳаёти, соғлиги, шаъни, қадр-қиммати, эркинлигига дахл қилади. Зўравонлик фақат жисмоний куч ишлатиш билан эмас, руҳий, ахлоқий, иқтисодий ва майший босим кўринишларида намоён бўлади. У оиласинг ҳар қандай аъзосига нисбатан

қўлланиши мумкин. Ҳақоратлаш, мажбурлаш, зўрлаш, иқтисодий чекловлар қўйиш, мунтазам руҳий қийноққа солиш каби ҳолатлар ҳам зўравонлик сифатида баҳоланади.

Аёлларга нисбатан зўравонлик муаммоси ҳар қандай жамият учун инсон ҳуқуқини поймол қилиш билан боғлиқ бўлган жиддий муаммолардан бири саналади. Бутунжаҳон соғлиқни сақлаш ташкилотининг маълумотларига кўра, бутун дунёдаги аёлларнинг 35,6 фоизи жисмоний ва жинсий зўравонликка дучкелади ва бу одатда уларнинг турмуш ўртоқлари томонидан амалга оширилади. Бу эса бутун жаҳонда мавжуд бўлган ўта долзарб муаммолигини исботловчи статистик маълумотdir.

Тадқиқотлардан маълум бўлишича, аёлларга нисбатан зўравонлик жаҳондаги барча мамлакатларда, уларнинг сиёсий, иқтисодий ва маданий тараққиётидан қатъи назар, мавжуд ҳолат ҳисобланади. Масалан, Японияда 59 фоиз, АҚШда 40 фоиз, Канадада 25 фоиз аёллар жисмоний зўравонлик қурбони бўладилар. Социологлар хулосасига кўра, 60 миллион аёл тури шаклдаги камситилиш, таҳқирлаш ва зўравонлик қурбони бўлишади.

Аёлларга нисбатан жисмоний ва жинсий зўравонлик бўйича энг юқори кўрсаткич Африкада қайд этилган – 45,6 фоиз. Европанинг паст ва ўртача ҳаёт

даражасига эга мамлакатларида бу кўрсаткич 27,2 фоизга тенг. Бироқ бу ривожланган давлатлар аёллари учун хавфсиз дегани эмас. Мазкур давлатлар хотин-қизларининг 32,7 фоизи ҳаётининг бирор палласида зўравонликка учрагани таъкидланади.

81 та давлатда ўтказилган ЖСССТ тадқиқотларида ривожланган мамлакатлардаги аёлларнинг 23,2 фоизи турмуш ўртоқлари томонидан зўравонликка учраши маълум бўлди. Шунингдек, бой ўлкалардаги аёлларнинг 12,6 фоизи бегона эркаклар томонидан жинсий зўрланади. Африкада эса бу борадаги кўрсаткичлар камроқ кузатилган – 11,9 фоиз.

Таҳлиллар яна шуни кўрсатадики, оиласдаги низо натижасида содир этилган жиноятларнинг 21,3 спиртли ичимлик, 10,1 фоизи етишмовчилик, 13,2 фоизи келишмовчилик, 7,4 фоизи менсимаслик, 16,8 фоизи жанжал, 10,3 фоизи рашқ ёки хиёнат, 9,7 фоизи адоварат, 6,1 фоизи молмулк талашиш, 5,1 фоизи ҳақорат қилиш каби омиллар сабабли бўлган .

Сенатор, Самарқанд вилояти хотин-қизлар раиси Гавҳар Алимованинг Sputniknews-uz.com мухбирига берган сўзларига кўра, Самарқанд вилоятининг ўзида 600 нафардан ортиқ ичкиликка ружу қўйган ва аёлига, фарзандларига тазийқ ўтказувчи эркаклар рўйхатга олинга-

ни қайд этилган. Ўтган йилнинг 8 ойи ичида Самарқанд вилоятида 109 та ўз жонига қасд қилиш ҳолати кузатилган. Шундан 20 тасига оиласвий масала сабаб бўлган, яъни 25 фоизи бевосита тазийқ ва зўравонлик оқибатида содир бўлган.

Матбуот анжуманларининг бирида Хотин-қизлар қўмитаси раиси Эльмира Баситханова ўтган йилнинг 5 ойи давомида "1146 – Ишонч телефони"га республика хотин-қизларидан 15 мингдан зиёд мурожаат келиб тушганини ва мурожаатлар асосан Тошкент шаҳар, Қашқадарё, Бухоро, Андижон, Хоразм вилоятларидан келганини қайд этади. Уларнинг энг кўпини уй-жой, оиласда ўзаро келишмовчилик, суд қароридан норозилик, алимент ундириш ва маҳалладан моддий ёрдам олиш масалалари ташкил этади.

2018 йилда аёлларга нисбатан жами 5 664 ҳолатда тазийқ ва зўравонликлар содир этилган бўлиб, содир этилган жиноятлар натижасида 932 нафар аёл жабр кўрган .

Юртимизда зўравонлик муаммоси билан курашишнинг ҳуқуқий асосини яратиш ҳамда хотин-қизларни ҳимоялаш механизмини кучайтириш мақсадида 2019 йил сентябрь ойида янги "Хотин-қизларни тазийклар ва зўравонликдан ҳимоя қилиш тўғрисида"ги Ўзбекистон Республикаси қонуни қа-

бул қилинди. Мазкур қонун давлатимиз раҳбари-нинг 2019 йил 7 мартағи "Хотин-қызларнинг меҳнат ҳуқуқлари кафолатлари-ни янада кучайтириш ва тадбиркорлик фаолиятини қўллаб-қувватлашга оид чора-тадбирлар тўғрисида"ги қарорига мувофиқ ишлаб чиқилди. Қонуннинг мақсади хотин-қызларни турмушда, иш жойларида, таълим муассасаларида ҳамда бошқа жойларда тазийклар ва зўравонликнинг барча шаклларидан ҳимоя қилишга қаратилган. Қонун билан таянч тушунчалар жорий этилди. Яъни зўравонлик, жинсий, жисмоний, иқтисодий, руҳий зўравонликлар, иш жойи, тазийқ, тазийқ ва зўравонлиқдан жабрланувчи, тазийқ ва зўравонлиқдан ҳимоя қилиш, тазийқ ва зўравонликтарнинг олдини олиш, муҳофаза ордери каби тушунчалар киритилди.

Бугунги кунда жойларда ҳам зўравонлиқдан жабр кўрганлар учун реабелитация марказлари ташкил этилган. У ерда улар учун ҳар қандай кўмаклар берилади. Бундай хайрли ишларнинг қилиниши мухтарама аёлларимиз учун қилинган сайъ-ҳаракатлардир.

Аммо жамиятда бу аёллар учун қанчалик кўмак ва шароитлар яратилмасин, унинг оиласидаги, эролидаги ҳурмати ва эътибори бўлмаса, бундай ёрдамлар нисбий бўлиб қоловеради. Мутахассислар

оиласидаги зўравонликларнинг келиб чиқишини отаонанинг фарзандларига меҳр-муҳаббат бермаганилиги, уларни бир-биридан ажратиб муомала қилганилиги, вақтида улар тарбиясига бефарқ қараганлари, назорат қилмаганлари каби бир қанча сабаблар билан изоҳлашади.

Оила - инсон учун муқаддас маскан. Айнан мана шу оиласидаги инсоннинг энг соғ ва покиза туйғулари, илк ҳаётин тушунча ва тасаввурлари шаклланади. Оиласидаги тарбия доимо мураккаб ва серқирралиги билан ҳам инсонга масъулият юклайди. Ҳар бир оила ўзига хос олам ҳисобланади. Оиласидаги соғлом муҳит, одамийлик, инсон-парварлик муносабатлари фарзандларимизнинг руҳий дунёсига таъсир кўрсатади. Гўзал муносабатлар шаклланишида динимизнинг, тўғри эътиқодимизнинг оиласидаги аҳамияти катта эканини унумаслигимиз керак.


Динимизда аёлларга юксак ҳурмат ва эътибор билан қаралган. Қуръони каримнинг 35 та сура ва 102 та оятида "аёл" сўзи ишлатилган, суралардан бири айнан "Нисо" яъни "Аёллар" деб номланиши ҳам аёлнинг мавқеи, унинг ҳаётдаги ўрни, ҳақ-ҳуқуқлари батафсил баён этилиши уларга бўлган эътиборнинг ёрқин ифодаси эмасми?! "Кимсан" деса, "Худога шукр, мусулмонман", дейдиган халқмиз,

алҳамдуиллаҳ. Аммо мусулмончиликнинг, жилла курса, "Аёллар хусусида Аллоҳдан қўрқингиз. Зоро, сиз уларни Аллоҳдан омонат ўлароқ олгансиз" деган огоҳига риоя этишни билайлик. Аёлнинг сиз учун омонат эканини унумаслигимиз керак.

"Ўлдириш ниятида калтакламаган-ку!" , Ўз жонингга қасд қилгин деб урмаган-ку!" деган уятсиз ва андишасиз "оқлов" қилишдан тавба қилиб, гуноҳларимизга каффорат сўрайлик.

Пайғамбаримиз алайҳиссалом: "Мўминларнинг энг иймони мукаммали гўзал хулқлиси. Сизларнинг энг яхшингиз аҳли аёлига яхши муносабатда бўладиганингиздир", (Ином Термизий ривояти) деганлар. Аҳли аёлига қўл кўтараётган эй эркак, мўмин бўлсангиз, ўзингизни шундай атасангиз, Пайғамбаримиз алайҳиссаломнинг ҳадисларини зое қилмасликка жаҳд қилинг. Зоро, сиз катта қўрғоннинг катта раҳбарисиз! Аёл эса сизнинг ортингизда катта бир жамоани шакллантирувчи ва уларни сизга бўйсундирувчи улкан бир кучdir! Сиз уни асраб-авайлласангиз, "мўмин" деган сўзга лойиқ бўласиз! Сиз уни гўзал хулқингиз ила, дин йўлида тарбият қилинг, у эса сизни, зурриётларингизни ва бутун бошли халқни тарбият қилади, иншааллоҳ!

Райхона



Боланинг жаҳли чиққанда...

Бир болакайнинг кичкина машина ўйинчоғи бор экан. Бола уни жуда яхши кўрар экан. Бир куни шу машиначаси синиб қолибди. Болакай мактабдан келиб қараса, синиб қолган ўйинчоғини онаси ахлат қутисига ташлаб юборибди. Бола жуда қаттиқ хафа бўлиб, жаҳли чиқибди. Жаҳлдан ўзини бошқара олмай, онасини муштлаб уриб юборибди. Онаси нима бўлаётганини тушуна олмай, ўғлининг бу

ишидан қўрқиб кетиб, йиғлаб юборибди. Бола ҳам бирдан ўзига келиб, қилган ишидан афсуланиб, нима қилишини билмай қолибди. Йиғлаб, онасидан кечирим сўрабди. «Бошқа бундай қилмайман, кечиринг», дебди ҳиқиллаб. Онаси эса гап нимада эканлигини тушунган бўлса ҳам, қаттиқ хафа бўлганидан бир қанча вақтгача ўзига келолмабди. Чунки ўғлидан бундай ишни кутмаган эди.

Кейин она нега бун-

дай бўлди, нима қилиш керак, деб ўйланибди. Қариндошлари, дугоналарига айтиб, маслаҳат сўраган экан, улар: «Она нима қилса ҳам, фарзанд онасига бундай муомала қилмаслиги керак. Қандай қилиб урса ҳам инадамай қараб турдингиз? Ўша жойнинг ўзида боланинг яхшилаб таъзирини бериб, жазолаш керак эди. Ҳали ҳам кеч эмас, яхшилаб уришиб, жазосини беринг», деб маслаҳат беришибди.

Она интернет орқали

Европада яшовчи бир психологдан маслаҳат сўраган экан, у: «Ўзингизнинг ҳам айбингизни тан олиб, кечирим сўранг. Бундай ҳолда жаҳл чиққанда куч ишлатмай, бошқа йўллар билан ғазабни босиш кераклигини тушунтириng. Масалан: «Нега ундай қилдингиз?!» деб бақиришинг мумкин, оёқларинг билан полни тапиллатиб ташласанг ҳам бўлади, лекин куч ишлатиб, бошқага зарар етказмаслик керак», деб тушунтириng.

Ичида алами қолиб кетмаслиги муҳим» каби маслаҳатлар берибди.

Она шу куни туни билан ўйланибди. Танишлари берган маслаҳатга амал қилса, ўғлининг олдида ўзининг ҳам айби бор – ўғли билан маслаҳатлашмасдан, ўйинчоғини ташлаб юборган. Психолог айтганидек, алами, нафрати ичида қолиб, кейинчалик руҳиятида, муносабатида намоён бўлиши мумкин.

Агар боласи ҳар гал жаҳли чиққанда ўзини психолог айтганидек тутса, жуда хунук кўринади, яна жаҳлда ўзини бундай тутиш саломат-

ликка ҳам ёмон таъсир қиласи... Юрак, қон-томир касалликлари келиб чиқиши мумкин.

Шунда онанинг ёдига «Руҳий тарбия» китобидаги ғазаб ҳақидаги мавзу тушибди. Китобни олиб, ўқибди ва эрталаб туриб, фарзанди билан ҳам бу мавзуни муҳокама этишга қарор қилибди.

Эртасига она боласи-

Ҳаётимиздаги ҳар бир иш Аллоҳнинг иродасисиз бўлмаслиги ҳақида фикрла. Таскин топасан.

Сендан сўрамай, ўйинчоғингни ташлаб юборганим учун кечир. Болажоним, баъзан катталар ҳам фарзандларини хафа қиласидиган ишларни қилиб қўйишади. Лекин бу ишни фарзандларига зарар етмаслиги учун қилишади. Синган ўйинчоғингнинг қиррала-ри сенинг бирор жойингни шилиб юборшини хоҳламаган эдим... деб-

ди.

Болакай онасини тушуниб, маҳкам қучоқлаб олибди ва ўзи ҳам қилган ишидан қаттиқ афсусда эканини айтибди. Жаҳли чиққанда амал қилиши лозим бўлган тавсияларни ёзиб олиб, дарс столи ёнига ёпишириб қўйибди. Уйда, мактабда, қаерда бўлмасин, жаҳли чиққанда тезда ўтириб, «Аъуузу»ни айтадиган бўлибди. «Ғазабини ютадиганлар» ояти ҳақида ўйлагани сари жаҳли ҳам деярли чиқмайдиган бўлибди.

Оиша

«...ғазабини ютадиганлар ва одамларни афв қиладиганлардир...»

га жаҳл чиққан пайтда ўзини тутиш бўйича қўйидаги тавсияларни айтиб берибди:

- Жаҳлинг чиққанида имкони бўлса, ўтириб олгин-да, қаттиқ хафа бўлаётганингни айт ва орқасидан «Аъуузу биллаҳи минашшайтонир рожийм», дегин. Қайтақайта айтсанг ҳам майли.

Шунда ҳам босилмаса, таҳорат олишга киришгин. Оли Имрон сурасининг 134-оятида келган «...ғазабини ютадиганлар ва одамларни афв қиладиганлардир...» деган жумлаларни эсла, ёддан тақрорла.



КИЗ ФАРЗАНДНИНГ ҲАЁТИДА ОТАНИНГ ҮРНИ

Қиз боланинг тарбияси билан унинг ота-онаси, буви-боболари, ака-укалари, опалари, аммаю ҳола, тоғаю амакилари иштирок этадилар ва улар қиз болани қандай тарбиялаш кераклигини яхши биладилар. Аммо бу қиз ўспиринлик ёшига яқинлашганида, вояга етганида, турмушга чиққанида унинг ҳаётида катта-катта муаммолар пайдо бўлиб, санаб ўтилган қариндош-уруғларнинг боши гангиб, нима қилишни билмай қоладилар.

Энг биринчи муаммо – бу ўспирин ёшида ахлоқ-одобида пайдо бўладиган ўзгариш. Айнан шу вақтда отаоналар қизларини “у ўзгариб қолди”, дея ҳали психологга, ҳали бувилариникига тар-

биялаш учун етаклаб борадилар. Бу ёшда қиз бола ўзига ҳаддан зиёд оро берадиган, катталарнинг гапини писанд қилмайдиган, кўп ёлғон гапирадиган бўлиб қоладилар, ўғил болалар билан гаплашишга мойил бўлиб, “севги балосига” учрайдилар.

Иккинчи муаммо – қиз бола турмушга чиққач, куёв билан келиша олмаслиги, унинг ҳоҳиш-истакларини тушунмаслиги, унга бўйин эгмаслиги ёки ундан ҳазар қилиб, алоҳида ухлашни талаб қилиш ҳолатларининг юзага келиши.

Учинчи муаммо – ёши улғая боргач, ўз турмуш ўртоғидан қўнгли тўлмасдан, ундан ажрашиб, ўз баҳтини

излашни истаб қолиш ҳолатлари.

Бизнинг халқимизда «Бола бошидан», деган нақл бор. Ҳамма муаммо аслида боланинг туғилиб, ота-онасини танишидан, овозларга, гап-сўзларга таъсири пайдо бўлишидан бошланади. Ана шу вақтдан бошлаб отанинг оиласда, қиз боланинг тарбиясида энг катта ўрин эгаллаши намоён бўла бошлайди. Афсуски, бизнинг жамиятимизда қиз боланинг тарбияси аксарият ҳолларда оналарнинг зиммасига тушади. Гўё қизни она, ўғилни ота тарбиялаши керакдек. Аммо бу нотўғри фикрdir. Қиз боланинг келажакда ўз турмуш ўртоғига тўғри муносабатда бўлиши учун жавобгар шахс

– бу қизнинг отасидир. Чунки ота қизининг ҳаётидаги ибрат кўрсатувчи ҳақиқий пособон, суюкли, меҳрибон, жавобгар, совук-иссиғидан хабар олувчи, таъминловчи энг биринчи ҳақиқий эркакдир. Бундай муомалани кўриб ўсган қиз келажагидан қўрқмайди. Чунки унинг учун бутун дунё унга меҳрибончилик кўрсатади. Худди шундай, қиз фарзанд ота учун гўёки қуёш, малика, ғурури-ифтихори ва дунёдаги энг гўзал ва энг ақлли инсондир. Суюкли ота бағрида ўсиб вояга етган қиз ўзига ишонган, ўзига юқори баҳо берадиган (чунки ота ўз меҳри билан буни исботланган бўлади), кўп ишлар қўлидан келишига ишонадиган, келажакда турмуш ўртоғининг ҳам суюкли аёли бўлишига кўзи етадиган бўлади. Айнан мана шу ишончлар бу қизнинг турмуш ўртоғини ва ўзини баҳтли қилишига замин яратади. Бу ерда шуни таъкидлаш лозимки, отанинг ўз турмуш ўртоғига қилган муомаласи келажакда қизининг ўз турмуш ўртоғидан кутадиган муомаласи каби бўлади. Яъни шунга лойиқ қиз бўлиб шаклланади. Мисол учун оиласда отаси онасига қўпол муомала қилади, дейлик. Баъзан қўл ҳам кўтаради. Онанинг ота олдида хурмати йўқ. Бу муносабатни кўриб вояга етган қиз, турмушга чиққач, ўз турмуш ўртоғидан худди шу муомалани топади ва шунга лойиқ аёл бўлади. Чунки оиласда кўрган вазиятлардан сўнг бу қизнинг онгида ҳамма эркаклар ўз аёлларига худди шундай муомала қилади, деган дастур битилиб қолади. Ҳамда

бу қиз онаси учун дили оғригани сабабли ўз отасига нисбатан катта адоватни бутун умр қалбида сақлаб юради. Бу эса қалбга катта зарба берувчи омил бўлиб, унинг фарзандларига ҳам ўз таъсирини кўрсатади. Яъни унинг фарзандлари ҳам ўз оталарига нисбатан адоватли ҳис-туйғуда бўладилар.

Агар қиз бола болалигидан ота меҳрига зор бўлиб ўssa, у ўзига ишончсиз, руҳан заиф, сўлғин, маҳдуд ёки аксинча, агресив, манман, эркаклардан устун келишга ҳаракат қиладиган, эркакларни ҳурмат қилмайдиган бўлиб вояга етади. Бу каби қизлар фақат ўзига ишонишга, ҳар қандай нарсага ўз кучига, оғир меҳнатига суюниб эришишга ҳаракат қиладилар. Чунки улар бирордан ёрдам сўрашни билмайдилар, шу билан бирга ўзларининг ожиза эканликларинитан олмайдилар. Шахсий ҳаётлари кўпинча аянчли ўтиши, баҳтга эришсалар ҳам, жуда катта йўқотишлар ва кўп тажрибалар туфайлигина эришишлари мумкин. Чунки қалбан улар эркак кишининг (қайси ниятда эканининг фарқига бора олмагани сабабли) бир оғиз ширин гапига учиб, ишониб, уни “ҳақиқий шахзода” деб қабул қиладилар, бу дунёда унингдек бошқа эркак йўқ, деб қабул қиладилар. Ёки ундан ҳам аянчлироғи, «ўз отамдан фалон, фалон томони билан фарқ қилади, отам онамни эзганидек, бу мени эзмайди, зулм қилмайди», деб адашадилар. Ҳатто кўпинча яхши инсонга турмушга чиқсалар ҳам, ўз турмуш ўртоғидан худди отаси онасига қилган муома-

лани топадиган хатти-ҳараткатни қиладилар. Аксарият ҳолларда эса ота онага зулм қилганини ва қиз фарзандига беэътибор бўлганини кўрган қиз турмуш қуришни ҳоҳламайди, «ўзига хон, ўзига бек» бўлиб, ёлғиз яшашни истайди ва «каръера қилишни» истаб қолади. Шунинг учун оталар ўз аёлларига нисбатан меҳр-муҳаббатли, эътиборли, ҳурмат-эҳтиромли эканликларини оиласда фарзандларга билдиришлари ўта муҳимдир.

Ота бўлиш – бу жуда катта масъулиятдир. Бу масъулиятни ҳис этиш эса жуда катта неъмат ва келажак авлодларга кучли таъсир кўрсатувчи муҳим омилдир. Қиз фарзандларига меҳрибон бўлиш, уларга совғалар улашиш, ширин гапларни айтиш, эркалатиш, уни ҳурмат қилиш, унинг ютуқлари билан қувониш, уни руҳлантириш, маслаҳатлар бериш, унга ғамхўрлик қилиш ундан туғилажак фарзандларнинг илм-маърифатли, баркамол бўлиб вояга етишлари, ўзига ишонадиган қадри баланд, мақсад сари интилувчан, ҳур инсон бўлиб етишишларида зарур омил бўлиб хизмат қиласди. Шунинг учун ҳар бир ота ўғил ва қиз фарзандларини ажратмаслиги, ижтимоий ҳаётнинг гўзал тарзда шаклланиши, жамиятимиз равнақи учун ҳаракат қилиши эса, бунинг учун эса ўзининг зиммасидаги улкан масъулиятни тўлиқ ҳис этиб яшashi керак. Валлоҳу аълам.



Фарзандларимизда Куръонга муҳаббат уйғотиш

Фикрлаш ва муҳокама

Китобнинг турлари жуда кўп. Фарзандингиз билан айнан шу мавзу очилганда, китобларнинг ҳар хиллиги – катта ва кичик, расмли ва расмсиз, умуман бошқача китоблар ҳам бўлиши мумкинлиги ҳақида суҳбатлашинг. Уйингиздаги барча ажойиб ва қизиқарли китобларни йиғиб, биргалиқда солиштириб чиқинг. Кўздан кечириб, ҳар бирдан ноёб ва қизиқарли томонини топишга ҳаракат қилинг.

– Нима деб ўйлайсан, инсонларга китоб нима учун керак?..

– Улар билим олишлари ҳамда олган билимларини бошқаларга ҳам тарқатишлари зарур...

– Қизиқ, китоблар бўлмаган даврда қандай қи-

либ билим беришган?..

– Мана, қара, бизда болалар учун ҳам, даданг ва мен учун керакли, фойдали маълумотларга бой бўлган турли хилдаги китобларимиз ҳам бор...

– Келажакда бу китобларга нима бўлади?..

Муҳокамадан сўнг болага Куръонни кўрсатинг!

– Бу қандай китоблигини биласанми?..

– Куръон ҳақида нималарни биласан, унда нималар ёзилган?..

Ажабланиш ва завқланиш

– Биласанми, шундай Китоб борки, у ўзида сирларни сақлайди. Уни ўзгартириш, унга қўшимча киритиш ҳам мумкин эмас. Кўпчилик Куръонни қайта ёзишга, ўзгартиришга ури-

нишган, лекин асрлар давомида бунинг уддасидан чиқа олишмаган ва бундан кейин ҳам бу ишни қила олишмайди, чунки Аллоҳ таоло бунга Қуръонда ваъда берган...

Қуръони Карим қанчалар ажойиб, мўъжиза китоб эканлигини ҳайратланарли даражада жалб қилиш орқали тушунтириб беришингиз муҳим бўлади...

Ижодкорлик

Агар мўйқаламни сутга ботириб ёки пахтали таёқча билан оддий қофозга ёзилса, қуригач, ёзув рангиз бўлиб қолади. Юқори ҳароратда, масалан, дазмол ёрдамида кўриниши мумкин. Аввало болага матн ёки сўзни шу тарзда ёзиб кўрсатинг. Агар у ўқиши билса, сўранг-чи, нима деб ёзилган, ўқий оладими йўқми? Кейин дазмолни юргизиб, ёзувни кўрсатиб беринг. Шу ерда Қуръон билан ўхашашликни тушунтирасиз: инсоният мавжуд экан, Қуръон ўзида ҳар бир авлод учун аталган сирларни сақлайди. Қуръондан мисоллар ҳам келтиришингиз мумкин, масалан, эмбрион сирлари, сув ҳақида ва ҳоказо. Шу тарзда Қуръон ҳақида тушунча пайдо қилишингиз ҳамда бола учун китобларнинг сultonи мавжуд эканлигини англашибингиз мумкин.

*ТРИЗ педагоги
Алсу Сагирова
(Ироди Исмаилова
таржимаси)*



БИЛИМСИЗЛИКНИНГ ШИФОСИ- САВОЛ

Аллоҳга муҳаббат

Ассалому алайкум. Менниг у дунёю бу дунёдаги мақсадим Аллоҳимга чексиз меҳр-муҳаббатда бўлиш. Бунга қандай эришсам бўлади? Қандай қилиб Аллоҳга чин ошиқ бўла оламан?

Одинахон Муҳаммад Юсуф:

Ва алайкум ассалом! Аллоҳга муқарраб бўлиш учун устозларимиз уч нарсани айтганлар. Аллоҳ фарз қилган нарсаларда бардавом бўлиш, солиҳларнинг сұхбатида бўлиш ва гуноҳдан тийилиш. Валлоҳу аълам.

НАФЛ РЎЗА

Ассалому алайкум. Ражаб ойида нафл рўза тутиш учун қилинадиган ниятда нима дейилади?

Одинахон

Муҳаммад Содик:

Ва алайкум ассалом. Зиммасида бошқа қарз рўзалари бўлмаса, ражаб ойида ҳам, бошқа ойларда ҳам тутиладиган рўзаларга «Холис Аллоҳ учун бугун субҳдан шомгача нафл рўза тутишни ният қилдим», деб ният қилинади. Валлоҳу аълам.

НАМОЗДАН КЕЙИН САЛОМ БЕРИШ ҲАҚИДА

Ассалому алайкум, ҳурматли устозамиз. Сиздан Аллоҳ рози бўлсин. Ҳаммамизга маълумки, намоз ўқиб бўлгандан сўнг ҳамма бир-бирига салом беради. Лекин яқинда мен салом бериб бўлмас экан, деб эшитдим. Шу ростми? Умуман, салом бериш кераклиги ҳақида ҳадис борми? Жавобингиз учун олдиндан раҳмат.

Одинахон Муҳаммад Содик:

Ва алайкум ассалом. Оят ва ҳадисларда айнан намоздан сўнг томонларнинг бир-бирларига салом беришлари ҳақида кўрсатма келмаган. Аммо умумий ҳолатларда салом беришга тарғиботлар бор. Шундан

келиб чиқиб, намоздан кейин саломлашишда танглик йўқ. Валлоҳу аълам.

ИЖТИМОИЙ ТАРМОҚДА- ГИ ВАҚТ ИСРОФИ

Ассалому алайкум! Бугунги кунда турли ижтимоий тармоқларда, асосан телеграмда турли хил муаллифи номаълум ва манбаси кўрсатилмайдиган каналлар жуда кўпайиб кетибди ва айрим илмли аёллар ҳам фаоллик билан шу каналлардаги маълумотни турли гуруҳларда улашишни ўзларига одат қилиб олишибди. Лекин манба ва муаллифи ҳақида маълумот сўрасак, ҳеч қандай маълумот йўқ, муал-

лифи кимлиги номаълум. Ва уларга манбанинг ҳам, муаллифнинг ҳам қизиғи йўқдек жавоб қилишмоқда. Кўпинча муаллифи ва манбаси ишончли бўлган илмий мақолалар, маълумотлар эса уларнинг нафсига оғирлик қиласидими ёки ёқмайдими, билмайман, эътиборсиз қолдиришади. Кандайдир шов-шувли, енгил-елпи, нафсига ёқадиган, саҳиҳ бўлмаган маълумотлар уларни ўзига оҳанрабодек тортиб кетмоқда. Узуқ-юлуқ маълумотларни қанча аёл қизларимиз ўқиб, вақтлари исроф бўлаётганига гувоҳ бўляпман. Психология нуқтаи назаридан қараганда мана шу ижтимоий тармоқларга қарамлиқдан халос бўлиб, тартиб билан китоб ўқиш орқали ёки ишончли бўлган интернет сайтларидан соф Исломни ўрганишлари учун аёллар-қизларга қандай тавсиялар берасиз?

Психолог Мадина Джураева:

– Ва алайкум ассалом! Интернет тармоқлари орқали кўп маълумотларни қабул қилиш, бир маълумотни ўқиб туриб, дарров бошқа маълумотга ўтиб кетиш мия иш фаолиятининг тез чарчаб қолишига, хотиранинг сусайишига, бу ўқиганларининг нафи бўлмаслигига олиб келади. Инсон бу ҳолатга тушса гўё кучи кетиб қолгандек бўлиб, чарчоқ ҳисси пайдо бўлади, фикрлари тарқоқлашиб, жамлай олмай қо-

лади, бирор қарор қабул қилишга ожизлик қиласиди, сўнгра эса жizzакилик пайдо бўлади. Аммо китоб ўқиганда бунинг акси бўлади. Китоб ўқиганда инсоннинг маънавияти ўсади, нутқи ривожланади, мулоҳазалари чуқурлашади. Китобдан олинган маълумотларни ўз ҳаётига татбиқ этиш учун инсон қалбидан чуқур ўрин эгаллади. Миянинг фаолияти бир маромда кетади, фикр ҳар хил маълумотларга бўлинмайди. Шунинг учун инсонда у даражада чарчаш сезилмайди.

Валлоҳу аълам.

ҚИЗИМГА СУНЬИЙ ТИШ ҚЎЙДИРСАК БЎЛАДИМИ?

Ассалому алайкум. Аллоҳ таоло илмингизни зиёда қилсин. Қизим 16 ёшга тўлди. 4 ёшида сут тишига пломба қўйдирган эдик. Энди ўша доимий тишлиари умуман қайта чиқмади. Жами 21 та тиш чиқсан. Юзи, лаб ва оғиз атрофи кичрайиб бормоқда. Чиқмаган тиш жойлари турибди. Ҳозирги ёшида оғзини тўлдириб, сунъий тиш қўйдирсак бўладими? Илтимос, маслаҳат беринг.

Шифокор Феруза Обидова:

Ва алайкум ассалом. Бу ҳолат тиббиётда адентия дейилади. Сизнинг қизингизда қисман адентия ҳолати кузатилмоқда. Одатда ўғил болаларда 18, қизларда эса 16-17 ёшда жағ-

суяклари тўлиқ шаклланиб бўлади. Шу сабабли 16-17 ёшгача ечиладиган ва ечилилмайдиган тиш протезлари қўлланилса, бу ёшдан кейин дентал имплантант қўйдириш мумкин. Стоматолог-ортопедга, ортодонтологга мурожаат қилинг.

МАЙИТ ЧИҚҚАН ЖОЙДА ТАОМЛАНИШ

Ассалому алайкум! Таъзияли хонадонга борганда дастурхон ёзилган бўлади. Қуръон тиловат қилиниб дуо қилингач, овқат олиб келишади. Бу таомларни таъзияга борганлар олиб боришади. Шу жойда таомланиш мумкин эмасми? "Аҳли майит дафндан кейинги уч кун ичида бошқаларга таом қилиб бериши макруҳdir", дейилган экан Кифоя китобида.

Одинахон

Муҳаммад Содик:

– Ва алайкум ассалом! Уч кун ичида дастурхон ёзилиши ножоиз. Яқиндан келганларга таом бериш ҳам ножоиз. Аммо узоқдан келган мусофиirlар бўлса, улар таом тановвлу қилиб олишлари жоиз. Лекин бу дегани узундан узоқ дастурхон устида ўтириш мумкин, дегани эмас. Қоринларини тўйдириб олсалар етарли. Шунингдек уларга майит аҳлидан бошқалар хизмат қиласиди. Таъзия ерига таом олиб бориш савобли иш. Бу таом майит аҳли учун олиб борилади. Меҳмонларга тортиш учун эмас. Валлоҳу аълам!

Ун оши

Керакли масалликлар:

Қайла учун:
200 гр. сариёғ
1баш каттароқ пиёз
4 дона қизил сабзи
Ярим пиёла нұхат
300 гр. қийма
Туз, пидина зирауори

Хамири учун:
1 дона тухум
Ун
Туз
1 пиёлада тұла нордон, ёғсиз
сузма (чакки).

Қайла тайёрлаш:

Қозонга ёғ солиб, бир оз қиздинг. Сүнгра пиёзни солиб, тилла ранг бўлгунича қовуриб олинг, сўнг сабзини солиб, яхшилаб қовуринг. 2 ош қошиқ пидина зирауорини солиб, бир оз қовургандан кейин 1-1,5 литр сув қўйинг. Сув қайнаб чиқмасидан аввал туз, ивитилган нұхат солиб, қайнаб чиққач, нұхатдан каттароқ думалоқ-думалоқ қилинган қиймаларни солинг. Нұхат пишгуннича паст оловда милтиллатиб қайнатинг.

Хамирли бўтқани тайёрлаш:

1та тухум билан ўртача қаттиқликда хамир қоринг. Тиндириб, хамирни ёйинг ва кўпроқ ун сепиб, норин катталигига ёки ундан бир оз йирикроқ (уградай) қилиб кесиб чиқинг. Қайнаб турган сувда тўғралган хамирларни пишириб олинг. Кўкатлар (айниқса райҳон) тўғраб, солинг. Оловни ўчиргандан 20 дақиқалар ўтгач, сузмани сув билан юмшатиб, хамирли суюқроқ аралашмага қўшинг. Таъбга қараб, туз-намагини ростланг.

Косага аввал хамирли ботқадан, кейин эса қайладан сузиб, дастурхонга тортинг. Ёқимли иштаха!



Аллақулова Гулшода